



地方志

叢刊續編

日本藏中國罕見

北京圖書館出版社

殷夢霞

選編

日本藏中國罕見
地方志
叢刊續編

第 3 册

北京圖書館出版社

第三册目錄

【弘治】太倉州志……………	一
【嘉靖】山陰縣志(一)……………	三七五



太倉州志序


古者史以記事自天子達於庶人二十五家爲閭生子則閭史書之閭亦有史況一國乎秦易封建爲郡縣史亦隨廢後世郡縣有志亦史之流裔也太倉在元爲漕海要津市聲霍霍季世嘗一遷崑山州治於茲迫於水寇州復故址我朝立太倉衛分衛鎮海控制三溟歲久甲冑奮張黔黎莫又當道遂奏聞割崑山常熟嘉定之地建立太倉州以爲襟轄眾議艱於割業兼才倍能始克有濟棗陽李侯由名進士起家令大邑擢柱史清德重望霄漢騰聲直道事人至於三黜至是舉守是州侯

莅任以三邑民心甘辛異味一治調和政若鉏犁強者
突封弱者沁窪剗高益卑俱爲平土又制立大防足以
垂示方來庶務草創上遵前監察御史蘇州守新蔡曹
公鳴岐成規下集同寅所長克殫心力翦剩補畸三易
寒暑州治告成與坐享成功者勞佚百倍未幾卽以州
志未修爲缺典禮請予至州專任其事志之初修猶州
新立文獻無考搜羅採訪凡數閱月始克成編分爲十
有一卷總若干萬言或嘲云一朝之志紀實而已斯志
每題有論有斷有若效司馬遷班孟堅范蔚宗之所爲
者窮日力於此亦勞矣哉予解之曰吾夫子作春秋實

筆削魯一國之史左氏所紀乃天下之史千古而下曾
謂春秋小於左傳者乎本州封疆不小於魯所屬崇明
亦可方顓臾與鄆子父母茲州誦法孔子其可小視其
志耶卷之爲一州之志放之爲天下之史其揆一也先
儒有曰僮僕知恩可以從政矣侯任憲職時式廓甚宏
縮治茲州名實加於上下不日將有監司廊廟之擢又
可以一州之治擴爲天下之治有如此志可爲全史或
者唯唯而退侯曰梓刻將完請以是言冠之於首予應
曰諾

宏治庚申秋八月一日柳州通判州人桑悅書

Blank manuscript page with vertical columns.



太倉州志凡例

一太倉州在元延祐二年以崑山州治遷於此者幾
四十年至至正十六年州治復移崑山國朝洪武
二年州降爲縣其民與太倉鎮海軍士雜居者凡
四區攷之崑山志凡云太倉人者其地乃崑山而
人則居於太倉者也州治旣立之後則爲州人矣
一太倉鎮海立衛學專淑武生而各邑秀士許其寄
育刷羽以翹青冥稽其所成同於一治故俱謂之
本學人崑山常熟嘉定割地成州之後楚雖有材
晉實有之凡科貢之類因各取其人而名其所自

出其餘倣此

一科甲所以進豪傑凡文章政事之美有非一節之所能盡者稽於見聞拔其菁華別立小傳然彼詳則此略者文有互見故也

一蓋棺事始定人之有善生不宜書但恐失今不書後遂湮滅因變例凡人年過古稀晚節可保者閒或書其一二云非特書者則不拘此例

一各傳中或云崑山人或云常熟人原其始也然非隸於州者不取

太倉州志目錄

卷之一

沿革 分野 里至 疆域 形勝 風俗 山

川 土產 市鎮

卷之二

城池 坊巷 鄉都 橋梁 牌坊 官廨 衙

院 倉場 鋪舍 壇壝 軍衛

卷之三

學校 戶口 田畝 稅糧 課程 賦役

卷之四

寺觀 祠廟 宅墓 古蹟

卷之五

科貢

卷之六

名宦 仕宦 儒林

卷之七

隱逸 藝文 孝友 義行

卷之八

列女 雜傳 藝術

卷之九



封贈 游寓 釋道 雜誌 攷證

卷之十上

詩

卷之十下

文

古今圖書集成

大倉州志目録

太倉州志卷之一

柳州府通判州人桑悅著

賜進士第前監察御史知太倉州事棗陽李端校正

同知太倉州事懷安周明編次

沿革

太倉州在蘇州府崑山縣治東南三十六里即古婁縣

之惠安鄉按舊志云春秋時吳王於此置倉故名太倉

又曰東倉悅按東溪楊諲云此倉或曰吳王渙之倉或曰五代吳越王之倉夫渙都廣陵不應置倉

遠七百里外枚乘說渙太倉乃在海陵今泰州也若云

錢氏之倉不惟去國都太遠且屢為淮南所陷殆其邊

境不可儲蓄據此為春秋時吳王之倉無疑又曰東倉

地居吳東益可信矣陳仲太倉事蹟以為吳孫權結好

於遼而置此倉不知何據又按三國志嘉禾二年權遣兵萬人九錫備物授公孫淵意師行糧食故爲是倉歟說不可信不歷晉隋唐事蹟莫考宋始置節置司酒庫元至元十九年宣慰朱清張瑄自崇明徙居太倉創開海道漕運而海外諸番因得於此交通市易是以四關居民閭閻相接糧艘海舶蠻商夷賈輻湊而雲集當時謂之六國馬頭元貞二年崑山縣陞爲州延祐元年徙治太倉至正十三年台州賊方國珍由海道犯境民罹兵燹立水軍萬戶府以鎮之十六年僞吳張士誠據吳始城太倉州治復移崑山二十七年歸附大明吳元年立太倉衛洪武十二年分衛鎮海至今並治一城宏治十年

巡撫右副都御史朱公瑄以撫安地方事奏聞割崑山常熟嘉定三縣地之切近太倉者立爲州建州治領崇明一縣乃隸蘇州府云

分野

太倉爲揚州之域上屬南斗

悅按舊蘇州志云揚州上屬星紀夫須女虛危玄枵也青州分野自濟達河其象爲天津絕雲漢之陽而岱宗爲十二諸侯之府比於星紀與吳越同占南斗牽牛星紀也吳越揚州分野南斗在雲漢下流當淮海間爲吳分牽牛去南河浸遠自豫章迄會稽南踰

嶺徼爲越分太倉吳地當屬於南斗無疑謂之星紀者日月五星之所經始者耳不可謂揚州之分星也里至

東至崇明西沙

南至嘉定縣

北至常熟縣

西至崑山縣

西南至南京陸路六百九十六里水路七百一十二里西北至北京陸路三千五百七十二里水路四千二百四十里

疆域

東濱大海西抵勝安鋪南接小南門鋪北至白茆塘東